

Bi' gvaq sujgyaj, miz ngoenz ndeu lajbyonghngoenz, gou caeuq bohlungz, daxboh caez bae Bwzhaij Yingzgouj epbya. Ngoenzhaenx mbwn gvengq, rumz cififi, ndit mbouj suenq ndat, ceiq hab epbya lo. Gou bwh ndei faexset, aenrieng, ngauehbya doengh-gij doxgaiq epbya neix le, couh buet bae henzhaij epbya. Neix dwg gou baez daih' it epbya. Youq gwnz roen, gou angq dangqmaz, cam neix cam haenx, muengh bae daengz henzhaij vaiq di. Gvaq buenq aen lai cungdauez, dou daeuj daengz baksok haij lo.

Gou sim gaenjlili dawz diuz faexset lumj diuzdwngx haenx cuengq haeuj ndaw haij bae. Gvaqlaeng, gou cij rox, epbya gaxgonq, aeu youq gwnz bakset ngauehbya. Ngauehbya dwg duzlix, yak yawj, aenndang raezrangrang, lumj duz sipndangi, youh lumj duzndwen. Gou aeu ngauehbya venj gwnz bakset, ndang duzde lij ning, gou lau dangqmaz. Daxboh riu gou dwg boux damjiq ndeu. Gou mbouj fugheiq, nyengh bae guh, doeklaeng haujlai nanz cij venj ndaej ngauehbya haeuj bakset bae. Venj ngauehbya ndei le, gou couh vut



faexset haeuj ndaw haij bae, liux le couh naengh youq gwnz aen daengqiq caj duzbya daeuj gwn set. Hainduj caj geij faen cung haenx, gou mbouj miz naihsim, yaepyaep youh sou faexset dauqma, yawjyawj miz mbouj miz duzbya hwnjset. Daxboh naeuz: "Gaej gip lai, aeu miz naihsim, miz naihsim couh itdingh ep ndaej duzbya. Mwngz ning bae doengh dauq, duzbya cungj

deng mwngz hwk deuz lo."

Dingq daxboh gangj yienghneix le, gou couh dinghcub naengh youq gwnz daengq naihsim caj. Gou cim-yawj gwnzhaij, youh gvaqbae daihgaiq miz haj faencung, gou roxnyinh maeset caem roengz raemx bae, couh gaenngip sou faexset dauqma. Swnh maeset yawj gvaqbae, gou yawjraen duz bya iq ndeu saetyatyat! Gou angq

dwk diuq hwnjdaeuq, duz neix dwg duz bya nduj gou ep ndaej ha. Daxboh dwen gou nyi, duzbya neix dwg byaloz. Gou angq lai lo, roxnyinh ngoenzneix guh baenz gienh saeh hung ndeu.

Gou daj gwnz bakset aeu duzbya iq roengzdaeuq, yawjraen neix dwg duzbya gig dwggvaez ndeu. Duzbya hung lumj fajfwngz nei, ndang hausaksak, fwed ronghcingxcingx, aen bak caeuq hwk baez aj baez haep, diuzrieng youq ndaw fwngz gou bi bae bi dauq. Aen ndang duzbya raeuz-radrad, cungj siengj daj ndaw fwngz gou cak deuz. Gou gaenngip cuengq duzbya haeuj ndaw aenrieng bae, de youh ndaej youq ndaw raemx angq dwk youz hwnjdaeuq. Gvaq le sam seiq aen cungdauez, gou ep ndaej caet duz bya. Yawj hwnjdaeuq, epbya mbouj lumj gou siengj baenz yienghhaenx nanz ep.

Daengngoenz yaek doekbya, dou dawz aenrieng bya rim haenx dauq ranz. Gij saeh epbya ngoenzneix hawj gou geiq ndaej ceiq laeg. Moix baez gou siengj hwnjdaeuq, cungj roxnyinh ndaengmoj lai, sim' angq lailai.

(Liuz Cincinz raiz / Veiz Yennaz hoiz)

Go' myokgveiq Ndaw Fwn

Ndit cik youq gwnz namh manhsaengsaeng, gou youq ndaw ranz hanh rihnnangnang, caiq diuz aen gunghdiuz daemq song doh le, gou ing youq henz cueng yawj baihrog. Gwnz daihloh hoengqhanghang, gwnz namh gij fwi hwngq de gung hwnjdaeuq, hwngq daengz gyoengq lwgnyez bakgvij bakdou aen bouq gai huq haenx cungj deuz lo, duzroeg caemh ndoj youq ndaw raemhfaex langxliengz. Gij mbaw go' myokgveiq ndaem youq ndaw hongh haenx miz di reuq, duiq doxroengz, lumjnaeuz yaek bang doengh dujva caengz hai haenx dangj ndit. "Haujlai nanz mbouj doek fwn lo, go' myokgveiq neix lix mbouj lix ndaej dem?" Gou lauheiq de dai bae.

Mbwn lumj rox ndaw sim gou ngvanh gijmaz nei, fwjndaem youq gwnzmbwn baenz benq baenz benq comz daeuj, aen daehsuliw gwnz namh deng rumz hung gienj hwnj mbwn bae, gvaq yaep ndeu caiq "ciu" dwk doek roengz laj ma. "Raq fwn neix onj hung lo!" Daiq gou yawj ok rog cueng bae da ndeu le cix yienghneix nam naeuz. "Hunglung!" Dahraix! Rog cueng hainduj deng fwn fat dwk "bibi baba", baez yaep da ndeu, fwn couh lienx baenz benq, "coco caca" boeg roengzdaeuq.

"Go' myokgveiq mbouj ngaiz gijmaz ba?" Gou hainduj heiq go-myokgveiq ngamq did va' ndok haenx, gaenlaeng gou doq bae yawj go faex de, gou siujsim riri roengz laeuz bae. Mbwn lij laepsaengsaeng, lumj gij maengndaem ndaw bingz mbouj siujsim daemj laemx nyumx hwnjbae nei, raemxfwn youq gwnz

namh conx bae fofo. Gou fwngz ndeu riuj gavaq, fwngz ndeu dawz liengj, byaij yamq dingz mbat menhmenh bae daengz henz go' myokgveiq. "Didi dada", gou depgyawj bae dingq gij sing raemxfwn doek youq gwnz mbaw de, gij sing de lumj diuz go iq nei. Gou ndwn youq haenx haujlai nanz, doeklaeng deng vunz-ranz hemq baema lo.

Fwn dingz lo, doenghgo youq ndaw hongh haenx caiq lix gvaq daeuj lo. Mbwn bienq ronghsagsag, hoengheiq moq dangqmaz, mbwn hix bienq liengz haujlai, gou buet

bae ndaw hongh haenx, ndaw sim roxnyinh geizheih, byaij daengz laj go' myokgveiq. "Rang hiha!" Gij va' ndok go' myokgveiq mboujdanh mbouj deng fwn rumz dwk loenq, yawj hwnjdaeuq dauqfanj engq lai ndei. Bande, gij hom go' nywj caeuq gij heiqva diemzrang go' myokgveiq doxgyaux, gij rang neix rox ndonj haeuj ndaw sim bae, ndei raixcaix.

Ndwenngoenz raeuz gizgiz cungj yo miz gyaeunde, couh lumj go' myokgveiq ndaw fwn nei.

(Cauh Swjihh raiz /
Veiz Munglingz hoiz)



Lwgbieng Ndaw Suenbyaek Iq



Daxmeh miz aen suenbyaek iq ndeu, ndawde ndaem lwgbieng, lwggve, lij miz makyungz.

Gou ceiq haengj dwg lwgbieng. Daxmeh youq ndaw suenbyaek dap aen gaq ndeu, lwgbieng yaek riengz gyaq dangh doxhwnj. Gij gaeu saeqraez haenx gaem diuz saux ndaetndaet bae, baez yamq baez yamq dangh hwnjbae, lumjbaenz naeuz: "Gou aeu maj sang!" Gou ngoenzngoenz cungj riuj aen huzraemx, siujsim riri dwk raemx coq lwgbieng, muengh gyoengqde maj hung.

Miz baez ndeu, gou saedcaih nyaenx mbouj ndaej, caegcaeg mbaet le aen lwgbieng ndeu, caj mbouj gib dwk haeb gaemz ndeu. Aiya, gij oen coeg bak gou in! Daxmeh yawjraen le, riu daengz dungx byonj: "Duz meuz gvij, aen lwgbieng neix lij caengz baenz ne!" Gou lumh bak in, hix nyaenx mbouj ndaej riu lo.

Daengz mwh lwgbieng ngamq sou, gou sim' angq dwk riuj aen lamz iq, gaen daxmeh bae mbaet. Gou ndwn youq gwnz daengq, ndiengq byaidin, iet gen raez, roengzrengz iet fwngz bae mbaet lwgbieng venj gwnz gaeu sangngeu haenx. Baez mbaet aen ndeu, ndaw sim gou doq angqvau liux!

(Vangz dunghyij raiz / Danz Yaujsuh hoiz)